

Siehe / Meine Seele / also wird abermal die vberschwengliche Krafft vnd vnaussprechlicher Nuzze/ der so ganz heilsamen Gerichte vnd Speisen/ so vber dem heiligen Brautmahl dir mitgetheilet werden/ dir ganz lieblich fürgestellt. Derowegen du diß alles dir wol solt zu Gemütche führen/ diesen so heiligen Sachen in wahrer Gottesfurcht vnd Christlicher Andacht/ vnd mit heiligen Gedancken durch des H. Geistes Beystand/ weiter nachsinnen/ vnd dieser heilwürdigen Speisen offte würdiglich genießen: Alsdenn wirstu solcher Krafft vnd Wirkung je mehr vnd mehr theilhaftig werden.

9. Mercke aber auch/ Meine Seele / deine Warnung/ vnd hüte dich für Sünden: so du dieser edlen Speise wilt zur Seligkeit recht gebrauchen. Welches dir der H. Chrylostomus mit mercklichen Worten zu Gemütche führet/ da er schreibet: Sicut corporalis cibus, cum ventrem invenit adversis humoribus occupatum, amplius lædit, magis nocet, & nullum præstat auxilium: ita & iste spiritualis cibus, si aliquem repererit malignitate pollutum, magis eum pedret, non sua naturâ, sed accipientis vitio. Das ist: Wie die leibliche Speise/ wenn sie einen Magen findet/ der mit bösen schädlichen Feuchtheiten erfüllet ist: denselben noch mehr verderbet vnd beschädiget/ vnd ihm keine Hülffe leistet: Also auch diese geistliche Speise/ des Leibes vnd Bluts Christi/ so sie einen antrifft/ mit Sünden verunreiniget/ vnd beschmizet/ verderbet sie denselben/ nicht zwar aus ihrer Natur/ sondern von wegen dessen eigener Schuld/ der sie unwürdig empfalet/ etc.

9.
Chryosto.
ser. de pro-
dit. Iud.

Dir sey Lob / Preis vnd Danck / O du Lamb Gottes / Jesu Christe / daß dir nicht nur am Creuzes Stamm/ deinen wahren Leib vnd Blut/ für mich hast in den Todt dahin gegeben: Sondern auch eben solch thewres vnd werthes Pfand/ vnter dem Brodt vnd Wein/ mir zu essen vnd trincken / in deinem heiligen Abendmal verordnet hast/ auff daß dasselbe mir ein gewisses Siegel sey/ dadurch alle deine Wohlthaten so du mit deinem bittern Todt erworben/ mir appliciret/ zugeeignet vnd vergewissert werden. Ja/ auff daß es auch

Dancksagung vnd Gebet.